



欽定四庫全書

集部

別集類存目二  
明

3  
203  
102

12  
130  
102

百二





115  
1330  
102

樂部

欽定四庫全書總目卷一百七十五

集部二十八

別集類存目二

明宣宗詩文一卷

浙江范懋柱家天一閣藏本

案明史藝文志載宣宗文集四十四卷今未見傳

本此冊僅廣寒殿記一篇玉簪花賦一首詩歌詞

曲三十九首非其全帙也朱彝尊明詩綜所錄宣

宗詩多此冊所未載意者彝尊尙及見其集歟

御製回文詩一卷

左都御史張若淮家藏本

別集類存目二

所錄  
有物



案此集載朱當泗所輯國朝典故中惟題曰御製不著朝代明史藝文志不著錄不知何帝所作其詩以春夏秋冬四景爲題有龍文連環八卦諸體凡二十八首蓋偶然遊戲之作流傳於外與他書宣示頒賜見諸國史者有殊故史不載也

元宮詞一卷

浙江巡撫採進本

不著撰人名氏前有自序稱永樂元年欽賜余家一老嫗年七十矣乃元宮之乳姆女知宮中事爲最悉閒嘗細訪之一一備陳其事故余詩中所錄

皆元宮之實事云云末題永樂四年夏四月朔日蘭雪軒製後有毛晉跋亦不知爲何許人案朱彝尊靜志居詩話曰元宮詞百首宛平劉效祖序稱周恭王所撰考定王以洪武十四年之國洪熙元年薨序題永樂四年則爲定王無疑矣定王名橐太祖第五子也明史周王橐傳用彝尊之說蓋以所考爲允矣詩凡一百首其中如東風吹綻牡丹芽一首燈以交光照綺羅一首玉京涼早是初秋一首深宮春暖



日初長一首二十餘年備掖庭一首月明深院有  
霜華一首珊瑚枕冷象身牀一首金鴨燒殘午夜  
香一首惻惻輕寒透鳳幃一首憔悴花容只自知  
一首小樓春淺杏花寒一首御溝春水碧如天一  
首燕子泥香紅杏雨一首春情只在兩眉尖一首  
白露橫空殿宇涼一首纖纖初月鶯黃嫩一首夢  
覺銀臺畫燭殘一首曉燈垂焰落銀釭一首尋常  
宮怨之詞殆居五分之一非惟語意重複且歷代  
可以通用不必定屬於元頗為冗泛其他切元事

者皆無註釋後人亦不盡解不及楊允孚灤京雜

詠多矣

楓林集十卷

安徽巡撫  
採進本

明朱升撰升有周易旁註已著錄是編前八卷皆  
詩文而以官誥及太祖手敕編入第一卷首與升  
文相連殊為非體第九卷載徽州府志本傳一首  
廖道南所撰詩贊一首竝翼運節略十餘則第十  
卷為附錄皆當時投贈詩文也升於明興之初參  
贊帷幄兼知制誥一切典制多出其手與陶安宋



濂等名望相埒陳敬則明廷雜記嘗稱其李善長  
徐達常遇春劉基四誥惜明文衡未及收入明史  
本傳載太祖大封功臣制詞多升撰時稱典核蓋  
據是文然統觀全集文章乃非所長詩學擊壤集  
而不成頗近鄙俚故朱彝尊明詩綜絕不登其一  
字況升身本元臣曾膺爵祿而賀平浙東賦序肆  
言醜詆毫無故君舊國之思是尤不可為訓也

槎翁集八卷

兩淮馬裕  
家藏本

明劉崧撰崧有槎翁詩集已著錄是編乃其文集

羅允升所校正而吉安知府徐士元為之刊版其  
文頗傷流易殊不及其詩

野莊集六卷

兩淮馬裕  
家藏本

明王鈍撰鈍字士魯太康人元至正丙午進士洪  
武初徵授禮部主事歷官浙江布政使建文中召  
為戶部尚書燕王篡立仍故官後以布政使勒致  
仕事蹟具明史本傳是集凡詩二卷文四卷皆未  
能入格前有王崇慶序謂嘉靖中其後裔曰朝獻  
者始謀梓之蓋集中多稱建文為今上皇帝故靖



難後懼觸語禁久而不敢出也

滄浪權歌一卷

浙江范懋柱家天一閣藏本

明陶宗儀撰宗儀有國風尊經已著錄是編詩詞合為一卷前有正德丁丑松江唐錦序稱其集不傳惟得此一卷為宗儀所自編今考其中詩詞皆已載南村集中惟題下莊子刺虎圖七言古詩一首題岳王廟七言長律十四韻一首為南村集所未載耳又對月七言律詩廿首未能娛綵侍句南村集作娛綵服疑此本為誤南浦詞序中一水竝

九山南過村外以入於海句南村集作一水兼九山則南村集誤也

危學士全集十四卷

江西巡撫採進本

明危素撰素有草廬年譜已著錄其原集本五十卷世久無傳明歸有光得其手藁因編為說學齋彙凡一百三十餘篇又所作詩名雲林集乃納新所編此本文十三卷詩一卷乃其鄉人取二集彙輯而成雖名全集實非原本故今仍錄說學齋彙雲林集以存其舊此本則附存目焉



元釋集一卷

編修汪如藻家藏本

明釋克新撰克新姓余氏字仲銘自號江左外史又稱爲雪廬和尚鄱陽人元末住嘉興水西寺洪武初召至南京嘗奉詔往西域招諭吐番所著有雪廬南詢彙此本別題元釋集僅古今體詩六十餘首考賴良大雅集載有克新詩四首而此本皆無之蓋後人於雪廬集中摘錄鈔存非其全彙也

愛禮集十卷

浙江巡撫探進本

明劉駟撰駟字宗道龍谿人洪武初徵秀才入試

者八千人駟爲第一授都御史尋坐事徙滇卒門人私謚愛禮先生故以名集凡文三卷詩二卷中庸說一卷書啟三卷附錄一卷駟宗陳淳之學詩文多涉性理略似語錄之體中庸說乃講授口義亦無所發明集爲宏治六年浙江參政林進卿所刊附錄慎獨翁行狀紀駟父寶與駟平生行實頗具乃其門人漳州陳拯所述又附趙先生書一首則駟之師趙彥進也

坦齋文集二卷

江蘇巡撫探進本



明劉三吾撰三吾字如孫自號坦坦翁茶陵人洪武中官翰林學士事蹟具明史本傳案鄭曉雷禮王世貞竝謂三吾於洪武三十年以罪誅死蔣一葵又謂三吾以作大誥漏言賜死明史則稱以考試不實成邊建文初召還今集中有敕下御製大明一統賦實建文時所撰與史相合是曉等所載皆不確知其集在明代不甚傳故以曉等熟於掌故者亦未之見矣此本乃成化中桐江俞蓋官茶陵時所刊萬歷戊寅茶陵知州韓城賈緣又重刊

之三吾於洪武中典司文章頗被恩遇然其文鉤棘而淺近未能凌轢一時也

齋集十六卷

福建巡撫採進本

明朱善撰善有詩解頤已著錄是集首載聶鉉所作墓誌稱名善繼然集中自稱曰朱善而詩經解頤亦題曰朱善則繼字殆刊本誤也是編前集十卷後集五卷又廣遊集一卷附刊於後善以文章為明太祖所知然核其品第究不能與宋濂諸人

雁行



甘白集六卷

浙江汪啟淑家藏本

明張適撰適字子宣蘇州人明初以儒士徵授水部郎中旋放歸見集中所作其妻沈氏壙志而其祭西平侯文則自署雲南滇池漁課司大使是洪武末又嘗官雲南故集中每自稱滇池老漁也集爲正統丁卯其子收所編文體修潔而未造深厚如在嘉隆以後則爲雅音在元明之間則未能與諸家壁壘相當也

秫坡詩藁七卷附錄一卷

浙江孫仰曾家藏本

明黎貞撰貞字彥晦秫坡其自號也新會人洪武初舉邑訓導不就坐事戍遼東尋放歸明史文苑傳附見孫蕢傳中是集初刻於嘉靖庚戌歲久散佚

國朝康熙丙寅其後人搜輯重刊凡詩詞賦三卷雜文四卷卷八附以贈言貞少從孫蕢學詩蕢集卽其所編次雖所造未深而風格尙爲適上惜此本掇拾於殘闕之餘其菁華已不槩見矣

竹居集一卷

兩淮馬裕家藏本



明王珙撰珙字廷珪常熟人是集為其曾孫仲申所輯其六世孫古始刊版朱彝尊明詩綜不載其名蓋偶未見也其詩多用洪武正韻蓋當時功令使然大致出入於月泉吟社一派亦時有秀句而邊幅單窘興象未深數首之後語意略同觀卷中絕無古體其根柢可知矣

別本袁海叟詩集四卷

江蘇巡撫採進本

明袁凱撰凱有全集已著錄此本乃正德元年陸深同李夢陽所刪定而何景明授其門人孫繼芳

刊於松江深及夢陽景明各為之序其版久佚今所存者傳鈔之本也後有萬歷己丑王俞跋已佚其前半不能考見始末惟篇終有偶續前刊輒附數言之語似乎俞又有所續入然題下多註選入詩綜字又似朱彝尊以後之本非其舊編矣

安分齋集十卷

江蘇巡撫採進本

明鄭本忠撰本忠自號安分先生鄞縣人洪武癸丑舉明經不起郡教授趙思盛薦授昌國訓導尋陞秦府教授是集乃永樂中其子復言永言所編



凡記三卷序二卷賦詩四卷雜文一卷甯波府志  
稱本忠少篤學從鄉先生舒卓受尚書方國珍據  
浙東三郡擅爵祿人本忠義不食其粟杜門不仕  
益務綜覽涵濡淳蓄爲文必中矩度又稱同時有  
鄭恕者字本忠亦爲昌國訓導建文四年靖難兵  
至不屈死事載遜國名臣傳疑爲一人然考是集  
詩文有作於永樂閒者姓字官爵偶爾相同未可  
合而爲一也

三畏齋集四卷

浙江江啟淑家藏本

明朱吉撰吉字季甯吳縣人洪武初官中書舍人  
是集凡詩二卷雜文二卷據其後序當時蓋嘗刊  
版今印本久佚惟鈔本存元末明初作者林立吉  
之所著殊未能伯仲其閒所以世不甚傳歟

新本白石山房彙五卷

浙江巡撫採進本

明張孟兼撰孟兼有白石山房逸彙已著錄是編  
乃其十一世孫思煌所重編思煌序稱孟兼舊有  
白石山房文彙二十卷與蜀山遺集竝遭回祿無  
片紙隻字之存及觀焦竑國史經籍志載孟兼集



六卷乃知萬歷初猶存文淵閣

案茲書雖名國史經籍志實鈔合諸

史藝文志及諸家書目而成非明文淵閣所貯之書楊士奇張萱二目可以互勘思煌此語殆誤謹

附訂於此然祕之內府人聞不得而觀茲不過殘編斷

簡中採而輯之僅存什一於千百云云今計編中

五言古詩九首七言古詩三首排律一首五言律

三首七言律六首七言絕句四首樂歌八章聯句

二首記四首行狀二首傳一首雜文一首皆掇拾

他書而得者附以諸家跋語分爲二卷其三卷至

五卷皆載同時投贈及後人詩文傳誌卷帙雖增

於舊本而孟兼之著作則無所增也

靜菴集一卷

兩淮馬裕家藏本

明張羽撰羽有靜居集已著錄此本刪存原集四分之一改名靜菴集不知何人所選其去取未爲

精當

陳竹山文集四卷

江西巡撫採進本

明陳誠撰誠有使西域記已著錄是集分內外二篇內篇二卷皆其奉使時所撰述僅文十餘首詩一百二十餘首外篇二卷則皆當時投贈詩文并



其先世諸狀也

退菴遺藁七卷

兩淮馬裕  
家藏本

明鄧林撰林初名彝又名觀善字士齊後成祖爲改今名新會人洪武丙子舉人任潯州府貴縣教諭秩滿入京預修永樂大典凡五年出爲南昌教授後又秩滿試高等遷吏部主事宣宗時以事謫杭州在杭多湖山之遊倡和甚富田汝成作西湖志多採之此本乃太常寺少卿會稽陳贄爲廣東參議時掇拾遺藁而成也

尹訥菴遺藁八卷附錄二卷

江西巡撫  
採進本

明尹昌隆撰昌隆字彥謙泰和人洪武丁丑進士永樂二年擢左春坊右中允改禮部主事爲尙書呂震誣構見殺事蹟具明史本傳昌隆死非其罪史稱其爲厲鬼以報震然當燕王構逆之初昌隆卽勸惠帝以禪讓其說甚謬燕王篡立之後獨以是奏得貸死則其人亦不甚可重是集爲其八世孫應中所梓鄒元標序之附錄二卷則載其詔敕行狀序傳之屬也傳中稱爲中允時進講有穿楊



集仁宗命其家錄進中途舟覆沒於水云云朱彝尊明詩綜祇稱有集而不載其名蓋未見此本然所選送孟潛陽先生教授邵武府學五言古詩一首是編亦不錄蓋採自他書編此集者又未見也

黃介菴集十一卷

浙江汪啟淑家藏本

明黃淮撰淮有省愆集已著錄案千頃堂書目載淮所著有介菴集歸田橐均不著卷數此本總名介菴集而分退直入覲歸田三橐疑黃虞稷未見此本但據傳聞載入也據目錄本十二卷今第七

卷已佚故以十一卷著錄焉

冢宰文集一卷

浙江范懋柱家天一閣藏本

明張統撰統有雲南機務鈔黃已著錄此集為嘉靖中富平訓導王道所編道序稱烽火之餘僅存什一於千百蓋其所遺者僅此也卷首有道所纂宦績一篇言統以永樂之故勺水不入口如是者七日終於吏部後堂考明史本傳成祖咎建文之改官制者乃令統解職務月給半俸居京師統懼自經於吏部後堂妻子相牽投池中死道所云云



固善善從長之意然非其實也

王天游集十卷

兩江總督  
採進本

明王達撰達有筆疇已著錄是集乃其門人王孚所編卷末又有其門人翟厚跋謂其館閣鉅製及諸子辨等篇咸未見錄乃重為增補編次仍為十卷云云則厚所重定非孚之舊本矣據孚稱達所著有天遊小橐梅花百詠古今孝子讚俱已梓行詩書二經心法學者多傳之又有耐軒雜錄五卷問津集一卷南歸集一卷通書發明一卷天遊詩

集十卷文集三十卷今皆未見惟景仰撮書一卷筆疇二卷附於此集之末者今尚有別本行世蓋即從此集鈔出云

黃忠宣集八卷

兩淮馬裕  
家藏本

明黃福撰福字如錫號後樂翁昌邑人洪武甲子舉人官至南京戶部尚書兼掌兵部參贊留都機務事蹟具明史本傳是集為其子琮所編冠以奉使安南水程殊乖體例餘多手札公牘皆不入格蓋福本以政績傳也



坦菴文集八卷

江西巡撫採進本

明梁本之撰本之名混以字行坦菴其別號也泰和人洪武中爲瑞州府學訓導遷溧陽教諭改魯王府紀善本之與其兄潛齊名蕭鎡稱所作泓渟澄深端重典則蓋莊人學者之文然規模與其兄相近骨力根柢則皆不及其兄也

桐嶼集四卷

浙江汪啟淑家藏本

明釋德祥撰德祥字麟洲號止菴錢塘人洪武中住持徑山吳之鯨武林梵刹志稱德祥以西園詩

忤上意今觀集中所載夏日西園一律有熱時無處可乘涼又有林木三年未得長諸句語意頗近譏諷之鯨說當有所據都穆南濠詩話曰國初詩僧稱宗泐來復同時有德祥者亦工於詩其送僧東遊詩云與雲秋別寺同月夜行船詠蟬云玉貂名竝出黃雀患相連泐復不能道也云云今案送僧一聯乃四靈之末派詠蟬一聯尤落滯相穆之所品殊屬乖方朱彝尊明詩綜於此集雖多所採錄然氣格薄弱終不能與泐等竝馳也卷首有福



建布政使富春姚肇序稱詩集一卷今本實四卷又集外詩一首其為何人所分析則不可考矣

松月集一卷

兩淮鹽政採進本

明釋睿略撰睿略字道權號簡菴蘇州人嘗以松月扁其軒人呼為松月翁因以名集前有洪武癸酉俞貞序後載姚廣孝塔銘稱其詩格高趣遠絕肖唐人製作無一點塵俗氣今觀其集大致亦承九僧四靈之派而陶冶之力則不及古人故邊幅淺狹意言竝盡五首以外規模略同廣孝之言未

為篤論也

林公輔集三卷

編修汪如藻家藏本

明林右撰右字公輔臨海人洪武中官中書舍人進春坊大學士輔導皇太孫以事謫中都教授是集多記序酬應之作惟題後數則閒及史事亦無特識至於故國舊君動多詆斥其視徐鉉撰李煜碑但陳運數有歸者用心之厚薄尤相去遠矣

逃虛子集十一卷類彙補遺八卷

浙江范懋柱家天一閣藏本

明姚廣孝撰廣孝長洲人初為僧名道衍字斯道



洪武中以僧宗泐薦選侍燕邸燕王謀逆資其策力居多篡立之後乃使復姓賜今名爵至資善大夫太子少師封榮國公然迄未改僧服事蹟具明史本傳廣孝為高啟北郭十友之一所著初名獨菴集沒後吳人合刻其詩文曰逃虛子集後又掇拾放佚謂之補遺其詩清新婉約頗存古調然與嚴嵩鈴山堂集同為儒者所羞稱是非之公終古不可掩也附載道餘錄二卷持論尤無忌憚姑蘇志曰姚榮國著道餘錄專詆程朱少師亡後其友

人張洪謂人曰少師與我厚今死矣無以報之但每見道餘錄輒為焚棄云云是其書之妄謬雖親暱者不能曲諱矣

光菴集二卷

兩淮馬裕家藏本

明王賓撰賓字仲光長洲人博聞強記尤精醫學隱居奉母以孝行稱少與姚廣孝相善吳中往哲記稱廣孝既貴歸訪賓賓弗與見方盥掩面而走黃姬水貧士傳所記相同明史廣孝傳中亦略載其事然觀賓集有所作賑災記稱廣孝為少師鋪



陳功德甚至賓沒後廣孝為之傳亦極稱譽是雨  
人交契終始如一蓋流俗欲推尊賓者造作此言  
殊非事實集凡文一卷後附諸家贊頌及吳中古  
蹟詩一卷詩共一百三十七首各有小序其文務  
為奇崛之語閒傷冗贅未能成家詩詞亦頗傷流  
易卷首記唐鈺林德暘二事全錄舊文而無所論  
斷或賓嘗手書此二節後人不考誤編入集歟

別本東里文集二十五卷

江蘇巡撫  
採進本

明楊士奇撰士奇有代言錄已著錄是集記二卷

序六卷題跋四卷碑銘十卷雜文三卷末一卷題  
曰方外凡為二氏所作悉別編焉蓋用楊傑無為  
集例疑即懷麓堂詩話所謂士奇自定之本以不  
及全集之完備故附存其目焉

胡文穆集二十卷

江西巡撫  
採進本

明胡廣撰廣有胡文穆雜著已著錄是集其裔孫  
張書等所刻凡詩八卷應制詩文一卷各體文七  
卷題跋二卷扈從詩及扈從北征日記一卷其第  
十九卷即所謂雜著也朱彝尊明詩綜錄其楊白



花一首謂世傳袁景文賦此題蓋緣讓皇遜國而作不無故主之思集中過顏平原文信國余青陽祠輒有弔古之作其題宋思陵所書洛神賦詞意悽惋不類牧豬奴云云似有意爲廣湔洗又卷首米嘉績序極論靖難之事斥死節諸臣之非而以廣之迎降爲是然公論久定要非可以他說解也集中論漢高祖初入關秦王子嬰獻傳國璽王莽篡漢亦從孺子嬰取傳國璽其受傳相似所謂天時非人力所致又論李若水乃宋之賊豈可以列

之忠義宋史失討賊之公云云持論殊爲倒置惟記高昌碑有裨史事李元忠神道碑所載事蹟頗詳亦足備唐史之闕耳

節菴集八卷續編一卷

浙江巡撫採進本

明高得暘撰得暘字節菴錢塘人遷居臨安洪武間有司以文學薦三爲校官永樂初擢爲宗人府經歷充永樂大典副總裁是集首雜著一卷次各體詩七卷鄒濟墓誌謂其生平橐多不存故所錄僅止於此誌又稱得暘與修永樂大典分掌三禮



編摩有方今核所纂三禮諸條於前人經說去取  
尚為精審蓋亦博識之士其詩文以清麗為宗如  
曲澗迴溪瑩澈見底而一往清激尚少淳蓄之致  
姚廣孝序乃以江漢奔流曲折千里擬之過其實  
矣

存軒集

無卷數 江蘇  
巡撫採進本

明趙友同撰友同字彥如浦江人徙居長洲洪武  
末官華亭訓導永樂初用薦授御醫與修永樂大  
典五經大全諸書集首結銜稱修職郎太醫院御

醫兼文淵閣副總裁蓋明初官制如此也其集皆  
賦頌記序雜文而無詩共一百四十四翻篇首雖  
標卷一而書中實不分卷數其文沿南宋餘習頗  
為平行在明初未為作手

澹然集五卷

兩江總督  
採進本

明陳敬宗撰敬宗字光世號澹然居士慈谿人永  
樂甲申進士選庶吉士預修永樂大典官至國子  
監祭酒贈禮部侍郎諡文定事蹟具明史本傳敬  
宗與李時勉同舉進士同時為南北祭酒時勉立



朝剛勁而待諸生則平恕敬宗亦立身端直而待諸生則甚嚴然同以德望爲士林師範世不得而優劣之惟文章質樸太甚又遜於時勉耳所著詩文集明史藝文志作十八卷此本乃萬歷四十四年慈谿知縣吳門陳其柱所編僅詩三卷文二卷亦非完本也

寅菴集三卷外集四卷附錄一卷

兩淮馬裕家藏本

明羅肅撰肅字汝敬號寅菴以字行廬陵人永樂甲申進士官至陝西巡撫是集爲其元孫廷相所

編詩文無詭僻之習亦無精深之致外集四卷皆誥敕像贊誄祭之詞附錄一卷爲桃林四景詩文蓋羅氏聚族之地也

覺非集十卷

浙江巡撫探進本

明羅亨信撰亨信字用實號樂素東莞人永樂甲申進士官至左副都御史亨信居諫垣有直聲其巡撫大同宣府值英宗北狩捍城有功生平著述每不畱橐是集乃其後人收拾散逸而邱濬祁順爲之詮次其中頌美中官之文至十餘篇編錄者



略不刪汰殊不可解也

西墅集十卷

浙江朱彝尊家  
曝書亭藏本

明曾棨撰棨字子棨永豐人永樂甲申進士第一  
官至少詹事棨文章捷敏信筆千百言立就劉昌  
懸笥瑣探稱成祖嘗御試天馬歌棨文先成詞旨  
瀏亮成祖賜以瑪瑙帶其思速可見然集中一題  
百首往往才氣用事而按切肌理不耐推敲是亦  
速成之過也此本乃萬歷中永豐知縣德清吳期  
炤所選錄雖頗為簡汰而菁華終鮮珍并觀瑣

言曰曾子棨詩佳處不減崑體曹安謫言長語亦

曰曾學士棨集絕似唐人殆未確焉

東墅詩集六卷

浙江范懋柱家  
天一閣藏本

明周述撰述字崇述東墅其別號也吉水人永樂  
甲申進士官至左春坊左庶子事蹟具明史本傳  
述及第時與從弟孟簡同榜成祖至比之二蘇史  
亦稱其文章雅贍然其詩不出當時臺閣之體也

質菴文集

無卷數  
汪啟淑家藏本

明章倬撰倬字尚文會稽人永樂甲申進士由庶



吉士授刑部主事官至禮部侍郎嘗與修永樂大典及五經四書性理大全事蹟具明史本傳其集本四十卷其子瑾等所編因倭亂散失茲編所存不及十之二三乃其裔孫元綸所蒐輯也凡賦四篇詩百餘首文僅三篇二篇爲記一篇爲敘又一篇併不標題皆錯雜於詩中殊無倫次又明詩綜載敝長安雪夜歸興絕句集中無之則舛漏亦殊不少末附錄祝壽詩一卷亦非古法也

南齋摘彙十卷

浙江巡撫探進本

明魏驥撰驥字仲房號南齋蕭山人永樂乙酉舉人以進士副榜授松江訓導召修永樂大典擢太常寺博士官至南京吏部尙書諡文靖事蹟具明史本傳是編爲其孫壻福建布政使錢塘洪鍾所編前集四卷兩京居官時所作後集六卷自景泰辛未歸田至成化辛卯所作蓋驥年九十八始卒故身歷七朝各有著述也前有鍾序云公爲文一本諸性情所發初不事雕刻務奇巧其彙具存皆公親書但其簡帙浩繁未易徧刻再閱原彙凡題



上有点注者皆公墨迹玩其詞意皆有益於事者也因摘取以付諸梓名曰摘橐黃虞稷千頃堂書目別載有驥前後集二十卷蓋其未摘之全橐今未見傳本其存佚不可考矣

東岡集十卷

兩淮鹽政採進本

明柯暹撰暹字啟暉更字用晦建德人永樂乙酉領鄉薦年僅十六明年與修永樂大典選入翰林知機宐文字進元免詩授戶科給事中以三殿災應詔陳言謫交趾驩州知州累遷雲南按察使致

仕歸事蹟附見明史鄒緝傳是集乃暹晚年所手訂劉定之序稱其詩文奇崛出人意料今觀所作文豪邁有餘而落筆太快少滌洄渟蓄之致詩亦矢口即成不耐咀詠是亦登科太早才高學淺之效歟

石潭存橐二卷

兩江總督採進本

明劉髦撰髦有易傳撮要已著錄是編上卷為詩中卷即易傳撮要下卷為義方錄義方錄者皆寄其子定之之手札而定之彙粹成編者也



若金集二卷

江西巡撫採進本

明彭百鍊撰百鍊字若金泰和人永樂乙未進士官至廣西道監察御史是編前有任敬敏序稱遺文分爲十四卷而是編僅二卷文三十九首詩四首後附他人所爲碑誌題詠而已考其族孫敏求跋蓋散佚之餘後復重鈔成帙也

歲寒集二卷

浙江汪啟淑家藏本

明孫瑀撰瑀字原貞以字行德興人永樂乙未進士官至兵部尚書是編乃其孫孚吉等所編凡文

一卷詩一卷前有李東陽序稱其詩平正通達無鉤棘險怪之態今觀諸作大抵純任自然不事結構韓愈所謂此詩有何好有何惡也

芳洲集十卷

江西巡撫採進本

明陳循撰循字德遵泰和人永樂乙未進士第一官至戶部尚書華蓋殿大學士英宗復辟謫戍鐵嶺石亨敗後循上疏自訟詔放還事蹟具明史本傳是編其裔孫以躍所輯附錄一卷則諭祭文誌銘祭文輓詩乞恩復官疏及祀鄉賢文移首列奏

欽定四庫全書

別集類存目二

三五



對而無章疏其自訟疏本傳尙載其略乃削而不存未喻何故殆久而佚其橐耶

東行百詠集句九卷附芳洲年譜一卷

浙江汪汝璉家藏本

明陳循撰是編乃其被謫東行時集古人詩句以成七絕初得三百首復疊和其韻至于餘首集句皆不著姓名頗多竄易牽就和韻諸作更多累句後附年譜一卷乃其門人王翔所錄當時敕諭及循所進詩頌俱載入其中亦非體例也

襪線集十五卷

江西巡撫探進本

明蕭儀撰儀字德容樂安人永樂乙未進士官吏部主事以疏論遷都北京不便忤旨見殺明史附見夏原吉傳中是集乃其子超進所編據其原目凡文十卷詩十卷此本僅十五卷蓋詩佚其五卷矣其文有紆徐曲折之致而意境不深其詩爲朱彝尊明詩綜所不錄殆偶未見歟

半隱集十卷

浙江汪汝璉家藏本

明陳衡撰衡字克平涪安人永樂丁酉舉人官亳州學正是集序四卷記一卷說一卷詩四卷附雜



文於後末有其甥方漢所撰行狀詩文皆不入格  
於明初諸人爲未能方軌竝驚也

石溪文集七卷附錄一卷

江西巡撫  
採進本

明周敘撰敘字功敘吉水人永樂戊戌進士官至  
南京翰林院侍講學士事蹟具明史本傳是編詩  
三卷賦頌詞一卷文三卷又以誥敕誌傳爲附錄  
一卷史稱敘初選庶吉士作黃鸚鵡賦稱旨得授  
編修今觀所作雖有春容宏敞之氣而不免失之  
膚廓蓋臺閣一派至是漸成矣其集編次無法至

以五言六句別標一體區之古詩之外而五言長  
律反入於古詩之中殊乖體例

尋樂文集二十卷

江西巡撫  
採進本

明習經撰經字嘉言號寅清居士晚自號尋樂翁  
新喻人永樂戊戌進士官至詹事府詹事經於成  
祖時亦以試黃鸚鵡賦稱旨擢授編修其賦今在  
集中又有皇都大一統賦朱彝尊撰日下舊聞未  
經收入蓋未見此集也集爲其子興化府同知襄  
所編其文結構頗有法而意境太狹往往失於枯

欽定四庫全書

集部 別集類存目二

七



寂未可云似淡而腴詩則七言長句清婉頗似東陽而他體未能悉稱也

松臞集二十八卷

江西巡撫採進本

明曾鶴齡撰鶴齡字延年一字延之泰和人永樂辛丑進士第一官至侍講學士詩多牽率之作命意不深而措詞結局往往為韻所窘殆非所擅長文則說理明暢次序有法大抵規撫歐陽頗近王直抑菴集而沈著則不及也直為作墓誌於其文章亦無所稱譽云

河汾詩集八卷

浙江汪汝璩家藏本

明薛瑄撰瑄有讀書錄已著錄是集第一卷載賦五篇餘皆古今體詩其孫禔於成化閒哀拾遺藁而成門人間禹錫為之序今考所載詩賦皆已編入全集中此猶其初出別行之本也

嘯臺集二十卷本天清氣集十四卷

浙江汪汝璩家藏本

明高棟撰棟一名廷禮字彥恢號漫士福建長樂人永樂閒自布衣徵為翰林待詔陞典籍明史文苑傳附見林鴻傳中閩中十子之一也其山居時



所作名嘯臺集入京後所作名木天清氣集棟嘗  
選唐詩品彙專主唐音實與閩縣林鴻共開晉安  
一派沿習既久學者剽竊形似日益庸腐併初始  
者受詬厲焉今觀嘯臺集詩八百首尚稍見風骨  
至木天清氣集六百六十餘首大率應酬冗長之  
作清氣之云殆名不副實其初與林鴻齊名日久  
論定鴻集尙見傳錄而棟集幾於覆瓿蓋亦有由  
矣

道山集六卷

浙江汪汝  
璫家藏本

明鄭棠撰棠字叔美浦陽人永樂中官翰林院檢討是集編次猥雜第一卷爲賦二卷爲辭頌銘贊四言五言古體詩歌行樂府七言絕句填詞而附以論二篇三卷爲記序而附以五七言律詩五言絕句後又附以雜文殊漫無體例卷四爲經筵講義卷五卷六爲元史評以雜著附入則固唐以來例也棠以文章選入翰林由典籍至檢討而於詩殊不擅長朱彝尊作明詩綜不登一字蓋非疎漏矣



恆軒集六卷

浙江汪啟淑家藏本

明韓經撰經字本常山陰人宋太尉琦之十二世孫以行誼稱於鄉里屢徵不出家居教授以終是集為其子監察御史陽所編凡古體詩二卷近體詩四卷語多質直主於抒寫已意而止非屑屑以文字求工者也

西澗文集十六卷

浙江巡撫探進本

明熊直撰直字敬方吉水人永樂中舉人以子槩貴贈右都御史是集詩二卷文十四卷有宣德五

年楊士奇序稱蘇明允父子一時皆有文名而明允老成歸然時號老蘇其官位竟不顯暨子貴乃進身後之命敬方亦今之明允乎今觀其文視明初宋濂王禕去之尙遠似未容上擬眉山也

鳳鳴後集十卷

浙江汪汝璩家藏本

明鄭楷撰楷字叔度浦陽人官蜀府左長史是集第一卷中載近體詩數首餘皆雜文前後無序跋其曰後集當尙有前集也朱彝尊明詩綜載義門鄭氏有槌枕榦桐四人而不及楷今觀其謝銀鈔



箋中稱家長兄幹則楷為幹弟殆因不以詩名故  
彝尊佚之抑或偶未之見耶

貫珠編貝集五卷

兩淮鹽政  
探進本

明沈行撰行字履德錢塘人是編前有魏驥序則  
當在永樂宣德間也是編皆集句之詩兼取唐宋  
元人之作貫珠言其聲之和編貝言其材之富然  
牽強湊合在所不免視後來香屑集之類其工巧  
自然百不及一矣

敝帚集二卷

江蘇巡撫  
探進本

明陳益撰益字啟行自號行素高安人永樂閒以  
五經教授於其鄉至景泰甲戌始卒是集乃宏治  
乙未其子揚所刊後燬於火萬歷中其裔孫德又  
重刊之所載皆古今體詩雜文僅寥寥數篇其意  
境頗清而歉於深厚文亦如之末以同時諸人哀  
輓之作別為一卷附於集末則皆德所哀集也

草窻集一卷

浙江范懋柱家  
天一閣藏本

明劉溥撰溥字原博草窻其別號也長洲人宣德  
初授惠民局副使後調太醫院吏目事蹟具明史

欽定四庫全書總目卷一百七十五

集部 別集類存目二



文苑傳史稱溥恥以醫自名日以吟詠爲事其詩  
初擬西崑晚更奇縱與湯允勣蘇平蘇正沈愚王  
淮晏鐸鄒亮蔣忠王貞慶等稱景泰十才子而溥  
爲之首今九人之集皆未見惟溥集存溥際土木  
之變忠憤悱惻之意時見於詩亦頗有足取者故  
朱彝尊靜志居詩話謂其在彼法中猶爲差勝然  
溥嘗語客云不讀一萬卷書看溥詩不得則虛憍  
太甚矣宋人云不讀萬卷書不行萬里路看杜詩  
不得溥乃更加一倍乎

廖恭敏佚藁一卷附錄一卷

江西巡撫  
探進本

明廖莊撰莊字安止號東山吉水人宣德庚戌進  
士官至刑部左侍郎諡恭敏事蹟具明史本傳莊  
爲給事中時嘗劾輔臣楊士奇縱子穆恃勢稔惡  
事下獄士奇固良相而溺愛其子庇之實甚當其  
權位嚴重之日已爲言人所不敢言景泰中疏請  
同羣臣朝見上皇於南宮又言皇姪猶子也宜令  
親儒臣誦經書以繫人心回天意疏上廷杖貶官  
定羌驛丞當新故嫌疑之際尤爲言人所難言其



勁節孤忠足以震動一世而文章則非所專門所著有東山居士集日久散佚淮自序尙存千頃堂書目則載莊漁梁集二卷今亦惟存其自序是兩集皆亡黃虞稷特據所徵各家書目載之耳此本爲莊裔孫仲蔚及其里人李日東所輯僅奏疏五篇其大要已見於本傳雜文二十篇詩五首則又草草應酬之作莊固不必藉是以傳附錄一卷皆祭文碑誌之屬莊亦不必藉是爲重也

澹軒集七卷

浙江巡撫探進本

明馬愉撰愉字性和臨朐人宣德丁未進士第一正統五年以侍講學士入直文淵閣官至禮部右侍郎事蹟附見明史楊溥傳愉沒後詩文散失成化庚子山東參政邢居正命青州知府劉時勉哀集遺亡而刊之凡詩賦四卷雜文三卷第六卷又有歌詩錯雜其中蓋隨得隨編故先後無序詩多酬應之作或佳者多佚耶然史稱愉端重簡默門無私謁論事務寬厚又載其清理滯獄及善處蕃使二事絕不稱及其著作蓋不以文采見也



別本澹軒集八卷

兩淮鹽政探進本

明馬愉撰愉集散佚之後其鄉人都御史遲翔鳳購得殘本更於愉家掇拾逸作補葺刻之故題曰續刻目中註續刻字者皆翔鳳所增也

尙約居士集

無卷數江西巡撫探進本

明蕭鎡撰鎡字孟勤泰和人宣德丁未進士官至戶部尙書文淵閣大學士兼翰林院學士事蹟附見明史陳循傳案鎡為蕭鵬舉之子鵬舉學詩於劉崧鎡不墜其家法史稱其學問該博文章爾雅

其門人邱濬序稱其文正大光明不為浮誕奇崛蓋洪宣閒臺閣之體大率如是也

淡軒藁十二卷補遺一卷

福建巡撫探進本

明林文撰文字恆簡莆田人宣德庚戌進士官至太常寺少卿兼翰林院學士諡襄敏是集詩三卷文七卷其十一十二兩卷乃附錄誥敕及行狀神道碑補遺一卷則又其詩文雜著凡有二本初刻者為其孫岳州同知希範重刻者為其曾孫南京大理寺寺正炳章此本即炳章所校也



吳竹坡文集五卷詩集二十八卷

江西巡撫探進本

明吳節撰節字與儉竹坡其號也安成人宣德庚戌進士官至太常寺卿兼侍讀學士是集為其七世孫琦所刊後附彭華所作行狀稱其為文章拔筆即就多至數千言滔滔不竭無刻苦艱窘態於詩五七言古今體隨題命意開合起伏不拘拘摹擬而自合矩度云云今觀其詩文皆直抒胸臆縱筆所如無不自達之意華所論頗得其真而淳蓄深厚亦遂不及古人所謂不踐迹亦不入室者歟

雲川文集六卷附恭愍遺文一卷

江西巡撫探進本

明鍾復撰復字彥彰雲川其號也永豐人宣德癸丑進士官至翰林院待講其詩文不出當時臺閣之體末附其子同遺文四篇一曰直言安國疏二曰送叔祖士傑之任序三曰送伯氏世楨南歸序四曰友蘭軒詩跋同字世京號待時景泰辛未進士官至貴州道監察御史以疏爭建儲下詔獄一時獻媚求榮者欲借以傾動英宗鍛鍊炮烙備極慘毒而同義不負故士卒無一語連南內竟拷斃



於獄天下悲之事蹟具明史本傳卷末又附墓誌  
一篇章綸為撰文廖莊為書丹皆與同時建言受  
禍幸而未死者也誌稱同在獄所作詩文彙綸藏  
於枕畔為獄卒竊去故所存止此忠臣著作理宜  
甄錄以寥寥不成卷帙故附存其目於此示表章  
焉

松岡集十一卷

浙江汪汝璫家藏本

明姜洪撰洪字啟洪號松岡江西樂安人宣德癸  
丑進士改庶吉士除檢討陞修撰以疾乞歸是集

序二卷記一卷歌詩二卷賦頌銘贊表一卷近體  
詩五卷文頗平淡詩亦妥適而步趨東里得其形  
似格律未能適上也

畏菴集十卷

兩淮馬裕家藏本

明周旋撰旋字中規別號畏菴永嘉人正統丙辰  
進士第一官至左春坊左庶子是集凡詩賦五卷  
雜文五卷樂清章綸為之序稱其典雅閒淡然在  
當時猶馳驅於流輩之中未能自闢蹊徑

桐山詩集十卷

浙江汪汝璫家藏本



金定四庫全書卷一百一十五  
明王偉撰偉字士英攸縣人正統丙辰進士官至  
兵部侍郎事蹟附見明史于謙傳偉所著有詩學  
正蒙久已散佚其桐山文集繁昌吳琛序刻之今  
亦未見此集凡詩九卷又以偉引疾告歸疏及贈  
行之作為附錄一卷乃其弟傑所錄其子添楨所  
重刊也史稱偉喜任智術既為于謙所引恐人目  
已為朋附乃密奏謙短冀以自異然卒以謙黨罷  
官蓋反覆不常之士又稱其年十四隨父戍宣府  
宣宗巡邊獻安邊頌得補安州學生則亦雋才然

詩多率意酬應乏研鍊之功蓋才士之文往往如  
斯矣

呆齋集四十五卷

浙江巡撫  
採進本

明劉定之撰定之有易經圖釋已著錄是集前彙  
十六卷存彙二十四卷皆分類編錄如代祀錄永  
新人物錄經筵講章策略皆在其中而鄉會三場  
試卷亦皆附列續彙五卷則成化乙酉以後所作  
不復分類以一歲為一卷焉明史本傳稱定之以  
文學名一時嘗有中旨命製元宵詩內使卻立以



侯據案伸紙立成絕句百首又嘗一日草九制筆不停書有質宋人名字者就列其世次若譜系然人服其敏博然其榛楛勿翦亦由於此李東陽懷麓堂詩話曰劉文安公不甚喜為詩縱其學力往往有出語奇崛用事精當者如英廟輓歌石鍾山歌等篇皆可傳誦讀者擇而觀之可也其言可謂婉而章矣

完菴詩集一卷

江蘇巡撫採進本

不著撰人名氏惟篇首有吳寬序稱完菴先生劉

公少為刑部屬出僉山西按察司事居三載棄官歸吳中所與倡和者武功徐公參政祝公及隱士沈石田數人考江南通志人物文苑類中載劉珏字廷美長洲人正統三年舉人官至山西按察司僉事老而好學工於唐律時人稱為劉八句所敘仕履與寬序合又藝文類中載完菴詩集長洲劉珏撰與書名亦合則此集蓋珏所作然其詩有亮節而乏微情不能如志所稱也

劉文介公集三十卷

兩淮鹽政採進本



明劉儼撰儼字宣化吉水人正統壬戌進士第一  
累官太常寺少卿春坊大學士掌院事明史附見  
周敘傳稱其景泰中典順天鄉試力持公道黜大  
學士陳循王文之子幾得危禍蓋剛正不撓之士  
也是集策表講章一卷記四卷序十四卷雜著六  
卷五七言古今體詩五卷尚洽臺閣舊體無疵累  
之可摘亦無精華之可挹

姚文敏集八卷

浙江汪汝  
璩家藏本

明姚夔撰夔字大章桐廬人正統壬戌進士官至

吏部尚書諡文敏事蹟具明史本傳是集本名藪  
蠶堆橐後其子璽刊版改題此名夔一代名臣風  
裁嶽嶽不愧古人而詩文乃直抒胸臆不中繩度  
如寄弟詩云嫩韭蒸來香滿口一滄午膳倍尋常  
太不以詞藻爲工矣此所謂人各有能有不能也

蘭軒集四卷

浙江汪汝  
璩家藏本

明沈彬撰彬字原質武康人正統壬戌進士官至  
刑部郎中其居官以強幹著不以詩文自鳴遺橐  
亦多散佚沒後百有餘年至隆慶己巳其鄉人周



維新始序而刻之以墓誌墓表諸篇附於後

靜軒集十三卷

浙江汪汝璉家藏本

明陳宐撰宐字公宐靜軒其號也泰和人正統壬戌進士官至兵部侍郎路璧所作宐小傳稱有金臺集金陵集滇南集金臺晚集存於家此本其季子佩所編錄累朝誥敕家譜序與搢紳投贈之作共為七卷冠於前併以為佩而作者附載卷內自第八卷以後始為宐所著詩文編次殊無體例

商文毅公集十卷

浙江巡撫採進本

一名素菴集明商輅撰輅有商文毅疏橐略已著錄是編為萬歷中淳安知縣漢陽劉體元所編凡文九卷詩一卷多館閣應酬之作不出當時暉緩之體

棊竹堂橐八卷

兩淮鹽政採進本

明葉盛撰盛有葉文莊奏議已著錄是集乃盛所自訂凡詩詞四卷文四卷詩詞皆非所長文有勁直之氣稍勝於詩然亦無傑構惟碑誌諸篇尚頗整飭有法耳



卞郎中詩集七卷

浙江汪汝  
曝家藏本

明卞榮撰榮字華伯江陰人正統乙丑進士官至  
戶部郎中榮在景泰閒盛有詩名居郎署二十年  
朝騎甫歸持牘乞詩者擁塞戶限日應百篇湯沐  
公餘日錄盛稱其狀元自是渴睡漢宰相須用讀  
書人一聯以為雖有剪裁渾無痕迹蓋亦儁才然  
所作大半皆酬贈哀輓之章亦多淺率蓋得之太  
易也是集為其門人無錫吳鍵所刊附以雜文十  
餘首亦非所長李東陽懷麓堂詩話曰詩在卷冊

中易看入集便難看古人詩集非大家數除選出  
者鮮有可觀卞戶部華伯在景泰閒盛有詩名對  
客揮翰敏捷無比近刻為全集殆不逮所聞是當  
時已有公論矣

白沙詩教解十卷附詩教外傳五卷

安徽巡撫  
探進本

明陳獻章撰湛若水註獻章有白沙集若水有二  
禮經傳測皆已著錄白沙詩教凡一百六十六篇  
皆闡發性理之作詩教外傳則皆獻章語錄之類  
足與詩相發明者若水以類排纂各為之標目獻



章於詩家爲別調不妨存備一格若水務尊師說必以爲風雅正宗至別撰此書以行言之似乎成理而實則不然王士禎居易錄曰如欲講學何不竟作語錄可謂要言不煩矣

彭文憲集四卷

江西巡撫採進本

明彭時撰時有可齋雜記已著錄其集原本十卷歲久散佚此本乃其六世從孫篤福所刊掇拾殘賸取盈卷帙不足見所長矣

劉古直集十六卷

浙江汪汝璠家藏本

明劉翊撰翊字叔溫號古直壽光人正統戊辰進士官至戶部尚書護身殿大學士諡文和事蹟具明史本傳是集乃其子太常寺卿欽所編凡詩五卷文十一卷志表祭文附於末翊當萬安劉吉等朋比亂政之時頗能持正故本傳稱安貪狡吉陰刻翊爲稍優顧喜談論人目爲狂躁又萬安傳稱在內閣者劉吉劉翊安爲首輔與南人相黨附翊與尚書尹旻王越又以北人爲黨互相傾軋然翊疎淺而安深鷲故翊卒不能勝則翊亦一客氣用



事輕率不檢者耳朱彝尊明詩綜謂其詩率意塗  
寫不事翦裁蓋肖其為人也彝尊又引李東陽語  
謂公於詩興之所到筆不能閣而無毫髮點綴呻  
吟之病云云考東陽序中無此語其語乃在王承  
裕序中考此本二序皆五頁版心號數相同裴緝  
者互易其末頁彝尊以仁裕語為東陽語知所見  
之本二序亦互易末頁矣

王端毅文集九卷

江蘇巡撫採進本

明王恕撰恕有玩易意見已著錄是集乃嘉靖王

子祥符李濂所編前六卷為文集平實淺顯無所  
雕飾如其為人喬世甯序稱當時以為其文無假  
英藻而質厚有餘不務以閎辨而歸準於躬行又  
最稱其荅劉太保書第七卷即玩易意見八卷曰  
石渠意見九卷曰意見拾遺皆說經之語各有別  
本單行濂用李石方舟集例又編入集中也

鳴秋集二卷

兩淮鹽政採進本

明趙迪撰迪字景哲懷安人自號白湖小隱朱彝  
尊靜志居詩話謂余憲百家詩以迪為山人徐庸



湖海著英集載其元夕應制詩徐泰明風雅則云  
迪宐陽人官吏部侍郎然鳴秋集有景泰五年迪  
仲子壯後序中云先人值時多故投老林泉而同  
時閩人均有輓鳴秋山人詩則二徐所云自是別  
一人矣是集卽其仲子壯所編前載林誌序稱其  
古詩不下魏晉而諸作則醇乎唐今考其詩古體  
頗爲薄弱誌說殊誣律詩諧暢差有唐音然亦晉  
安一派也

王文肅集十二卷

浙江孫仰曾家藏本

明王慎撰慎有毘陵志已著錄此集亦名思軒橐  
卷首載李東陽所作傳謂其官吏部尚書時上疏  
陳八事多見採納今其疏不見集中止存經筵進  
講文華進講二卷殆有所避而不載歟抑東陽溢  
美也

王太傅集二卷

浙江汪汝礪家藏本

明王越撰越字世昌濬縣人景泰辛未進士官至  
兵部尚書以功封威甯伯諡襄敏此集稱王太傅  
者其贈官也考明史越本傳功名頗有可觀惟以



前結汪直後依李廣為士論所輕是集分體編輯附錄雜文前有嘉靖九年吳江吳洪序稱其遺藁散佚不傳有郢人高德崇錄所見聞刻之於學舍乃行於世後越會孫紹思別輯全集其跋中所稱在楚有太傅詩文集者即此本也

王襄敏集二卷續集一卷

浙江汪汝璉家藏本

明王越撰是編即其會孫紹思所輯第一卷為疏議皆處置邊務及奏報捷音第二卷為雜文續集一卷為詩及詩餘而以李東陽所作墓誌崔銑所

作神道碑附錄於末越本魁傑之才其詩文有河朔激壯之音而往往傷於粗率

野菴文集十卷

江西巡撫採進本

明吳宣撰宣字師尼野菴其別號也崇仁人景泰癸酉舉人授左軍督府經歷坐劾長官不法繫獄十年始得釋改中府陞鎮遠府知府道病卒其文落落有氣而格律未嚴是集乃其門人王君謨等所編未經刊行其元孫道南復訂正藏於家前有道南自述顛末一篇



奉使錄二卷

兩江總督  
採進本

明張甯撰甯有方洲集已著錄是集乃甯天順四年出使朝鮮所作已編入方洲集內此其初出別行之本也上卷首敘奉使召對及奏稟數篇餘皆途中留題之作下卷則至朝鮮以後篇什題曰皇華集註云朝鮮刻本前有崔恆序乃奉國王李瑋命編次而序之者也朱彝尊靜志居詩話載甯兩使朝鮮水館星郵留題殆遍館伴朴元亨詩篇唱和殊不相下及偕登太平館樓甯成七律六十韻

元亨誦至溪流殘白春前雪柳折新黃夜半風之句乃閣筆曰不敢屬和矣然其詩縱調騁情才思雖捷而少沈思故王世貞謂甯詩如小櫂急流一瞬而過無復雅觀也

彭文思集六卷

江西巡撫  
採進本

明彭華撰華字彥實安福人景泰甲戌進士官至吏部侍郎入內閣逾年以風疾去卒諡文思事蹟附見明史萬安傳所著有素菴集九卷李東陽序稱其文嚴整峭潔力追古作者今未見傳本此本



欽定四庫全書總目卷一百七十五  
為其六世孫篤福所編視原集僅十之三矣

恥菴集十卷

浙江汪汝璉家藏本

明陳煒撰煒字文曜別號恥菴閩縣人天順庚辰進士官至浙江左布政使煒風裁峻整為御史時劾罷錦衣指揮門達在江西平反疑獄為民興利除弊具有實績詩文非所注意是集乃正德初其從子墀為東莞知縣時所刊嘉靖中其孫全之復補輯之而以贊輓諸詩附於其末

禮庭吟二卷

衍聖公孔昭煥家藏本

明孔承慶撰承慶字永祚曲阜人至聖六十代孫也年三十一未及襲封而卒其外祖王惟善為哀其遺詩以成此集有景泰閒同郡許彬序又有天順丁丑長洲劉鉉序歲久散佚康熙庚辰衍聖公孔毓圻檢校先世遺藁又得而重刊之

耕石齋石田集九卷

兩江總督採進本

明沈周撰周有石田雜記已著錄是集乃瞿式耜所刪定凡詩八卷文一卷其詩與華汝德本互有出入文則華本所未收然周詩猶以天趣勝文則



更非所長徒爲贅疣矣

桂坡集十五卷

浙江汪汝璫家藏本

明左贊撰贊字時翊南城人天順丁丑進士官至廣東布政使是編凡前集五卷後集八卷皆詩賦雜文而以所作方外諸篇別爲一卷附於末蓋用楊傑無爲集例至於樂府一卷之中如關山月楊白華之類皆古題而忽以詞曲續其後則從來無此體例殆以宋人詞曲亦標樂府之名故合爲一不知源流遞變格律各殊不可以宋之樂府竟當

古樂府也贊嘗刪定李觀集蓋亦頗留心詩古文者然所作質朴而不能健清淺而不能腴其於古格僅僅具體云爾

別本彭惠安公文集七卷附錄一卷

兩江總督採進本

明彭韶撰韶有政訓已著錄所著詩文名從吾滯稟已散佚不存是集乃御史陳時周所重編已多所刊削非盡精要附錄一卷則楊守陳陳獻章等贈言及府志傳論也

餘力稟十二卷

副都御史黃登賢家藏本



明徐貫撰貫字元一涪安人天順丁丑進士官至工部尙書諡康懿是集乃貫所自定前有宏治己未自序其子頤初刊於舒城閒有遺佚嘉靖王子其次子健倅歸州時復增訂梓行詩文皆平實然大半應酬之作也

栗菴遺藁二卷

浙江汪汝璩家藏本

明鄭環撰環字瑤夫號栗菴仁和人天順庚辰進士官至太常寺少卿是集有其子孟繩跋稱環集本十卷不戒於火茲集乃其搜輯另編者楊守陳

作環墓碑稱其文章典雅瞻密今此本所存無多體亦不備不足以見其全守陳所論難遽定其確否也

東白集二十四卷

浙江孫仰曾家藏本

明張元禎撰元禎五歲能詩甯靖王召見名之曰元徵巡撫韓雍爲改今名字廷祥南昌人天順庚辰進士官至吏部左侍郎兼翰林院學士掌詹事府天啟初追諡文裕事蹟具明史本傳是集凡詩文二十三卷末卷則附錄事實祭文元禎以講學



爲事其在講筵請增講太極圖西銘通書夫帝王之學與儒者異詎可舍治亂興亡之戒而談理氣之本原史稱後輩姍笑其迂闊殆非無因矣其詩文樸遯無華亦刻意摹擬宋儒得其形似也

定菴集五卷

兩淮鹽政採進本

明張悅撰悅字時敏華亭人天順庚辰進士官至南京兵部尚書諡莊簡事蹟具明史本傳是集凡詩一卷文四卷大抵流易有餘而頗乏雋永之味

吳川集十六卷附錄二卷

浙江孫仰曾家藏本

明祁順撰順字致和吳川其號也東莞人天順庚辰進士官至江西左布政使其集前載有韻之文次爲詩詞次爲散體末附張元正所作墓誌賈宏所作墓表各爲一卷

東園詩集續編八卷

浙江范懋柱家天一閣藏本

明鄭紀撰紀有東園文集已著錄是編其詩集也初紀子主一主敬嘗編其詩爲十二卷今未見傳本此本乃其少子忠菟輯遺篇故題曰續集集中如古塹斜連江樹沒飢烏恆傷野人飛橋頭雨歇



徑初濶天際雲收山漸多等句亦頗有南宋風格然亦止於如此耳

東瀧遺藁四卷

江西巡撫採進本

明彭教撰教字敷五號東瀧吉水人天順甲申進士第一官至翰林院侍講集中詩文類多應酬之作李東陽序云敷五年僅四十餘編摩考校之外無由自試而文又不盡其蘊蓋亦微詞也

閔莊懿集八卷

浙江巡撫採進本

明閔珪撰珪字朝英烏程人天順甲申進士官至

南京刑部尚書左都御史事蹟具明史本傳是編乃其詩集集中七言律詩多至六卷大抵皆酬贈之作蓋珪老成持重治獄平允為當代名臣後以不阿劉瑾告歸其立身自有本末吟詠則非所畱意云

桃溪淨藁八十四卷

江蘇巡撫採進本

明謝鐸撰鐸有赤城論諫錄已著錄是集凡詩四十五卷文三十九卷蓋李東陽因其舊本再取而芟之故以桃溪淨藁為名然瑕瑜參半猶不能悉



為刊除也

州集十卷續集二卷

浙江汪汝璉家藏本

明張泰撰泰字亨父太倉人天順甲申進士官至翰林院修撰事蹟具明史文苑傳泰為人恬淡獨喜為詩初與李東陽齊名後東陽久持文柄所學彌老彌深而泰不幸早終未及成就故聲華銷歇世不復稱今觀是集大抵圓轉流便而短於含蓄正如清水半灣洮洮易盡視東陽懷麓堂集實相去逕庭故東陽作序亦云將極於古人而不意其

遽止云

西山類稿五卷

兩淮馬裕家藏本

明謝復撰復字一陽祁門人少從吳與弼游與陳獻章為同門友而篤實勝於獻章故集中有書獻章詩後一篇頗詆其晚涉於佛老其宗旨可見然其詩文則不出講學之門徑與談藝家又別論云

陳剩夫集四卷

福建巡撫採進本

明陳真晟撰真晟字晦德改字剩夫又自號曰布衣家本泉州以父隸鎮海衛戍籍遂為漳州人天



金定四庫全書總目卷一百七十五  
順中嘗詣闕上書獻所撰程朱正學纂要兼上書  
執政均不見收又上書當路獻所撰正教正考會  
通亦不見省而罷又作學校正教文廟配享疏擬  
詣闕再上未及行而卒事蹟具明史儒林傳是集  
乃真晟卒後其鄉人林祺所編康熙己丑儀封張  
伯行官福建巡撫乃爲序而刻之所獻二書今皆  
載集中其程朱正學纂要首爲程氏學制次爲推  
明朱子兼補之法次爲心學圖說其圖凡二一爲  
六十四卦圓圖圖下大書一心字一爲太極圖圖

下亦大書心字次爲立師說補正學輔皇儲隆教  
本振風教五條其正教正考會要首列朱子學校  
貢舉私議次敕諭大略次程氏學制次呂氏鄉約  
次德業過違二條次立師考德考文三條大意以  
爲天下之事莫大乎此故次卷載所上當路書曰  
朱子抱哭其書四百年矣曾無一人憐而省之者  
此魏鶴山真西山許魯齋吳草廬諸儒不能無大  
罪也既讀其書宗其道則實吾師也父也豈有視  
父師之哭而弟子能愬然耶又謂宋元兩朝皆以



不用程朱之學故上干天怒奪其命以與明持論  
頗僻又題玉堂賞花集後詆譏執政謂不賞其程  
朱纂要而羣聚賞花後世不免謂之俗相尤為褊  
激林雍作真展行實稱其既無所遇每四顧徬徨  
不能自釋亦異乎尋孔顏之樂者矣

履坦幽懷集二卷

編修祝德麟家藏本

明祝洪撰洪字汝淵號夢窻海甯人以子萃貴封  
刑部主事明詩綜作祝祺云或作洪此本乃其家  
刻明作洪字則詩綜誤也是集為餘姚胡培所編

凡文一卷詩一卷

思元集十六卷

浙江汪啟淑家藏本

明桑悅撰悅有桑子庸言已著錄是編賦一卷文  
八卷詩六卷詩餘一卷附刻一卷則悅之志傳也史稱  
悅為人怪妄敢為大言以欺人朱彝尊靜志居詩話稱  
悅在長沙著庸言自詡窮究天人之際非儒者所  
知又自稱其詩根於太極則史所云怪妄不虛也  
所作兩都賦有名於時然去班固張衡實不可道  
里計而誇誕如是淺之乎其為人矣



涑水集二卷 兩淮鹽政採進本

明文洪撰洪字功大號希素長洲人成化乙酉舉人官涑水縣教諭故以名集洪為待詔徵明之祖故朱彝尊靜志居詩話云長洲文氏世載其德希素先生實始之詩饒有恬淡之致是集案洪自序稱檢前後所作汰之得百篇蓋所自編然此本末附遺文七篇則後來又有增入非手定之舊藁矣

龍臯文集十九卷 浙江孫仰曾家藏本

明陸簡撰簡字伯廉號治齋龍臯其別號也武進

人成化丙戌進士官至詹事府少詹事是集有文無詩冠以日講直解及經筵講章李東陽為撰墓誌稱其文縝密峻潔力追古作而不輕應接有求之經歲而不得者又云所著已累百數十卷今所存者僅若此則知其佚者多也其文義蘊未深而平正樸實於長沙一派為近蓋何李未出之前文格大率如是也

東海文集五卷 兩江總督採進本

明張弼撰弼字汝弼華亭人成化丙戌進士官至



南安府知府事蹟具明史文苑傳是集前四卷皆雜文後一卷皆附錄弔輓銘贊之作考吳鉞序稱其子輯錄詩文若干卷則其文原與詩合刻此本偶佚其半也弼工草書為世所重其文則直抒胸臆不事鍛鍊李東陽懷麓堂詩話載弼自評其書不如詩詩不如文以為英雄欺人之語誠篤論云

東臯文集十三卷附錄一卷

浙江巡撫採進本

明陸淵之撰淵之字克深上虞人成化丙戌進士官至河南布政使是集為其門人王汝鄰所刻前

有其門人劉瑞序曰讀先生之文者知其大可也乃若較聲律評矩矱區區於文字家者亦淺之乎知先生矣殆微詞歟

張文僖公文集十四卷詩集二十二卷

浙江巡撫採進本

明張昇撰昇字啟昭南城人成化己丑進士第一官至禮部尚書事蹟具明史本傳是編乃其子浙江布政使元錫所刊前有嘉靖元年邵寶序謂此書本名柏崖集刻成而賜諡之命適至遂以名之然本傳不言有諡或偶漏歟昇立朝頗著風節而



其文多應酬之作末附瀛涯勝覽及北行錄西行錄皆縷述見聞無所考證詩則近體多於古體而七言近體尤多於五言是足驗其所得矣

使東日錄一卷

浙江巡撫採進本

明董越撰越有朝鮮賦已著錄是集乃宏治元年越為朝鮮頒詔正使途中紀行之詩考越奉使時官庶子而刻本首行結銜乃作儒林郎大理寺寺字以下刊版刊滅不可辨其姓名疑或校刊者所題歟

太和堂集六卷

浙江汪汝璫家藏本

明屠勳撰勳字元勳平湖人成化己丑進士官至刑部尚書諡康僖是編詩四卷文二卷以神道碑墓誌附於末陳懿典序稱合刻屠氏家藏二集蓋其子應坡有蘭暉堂集當日合為一編耳

交石類彙三卷

兩淮鹽政採進本

明吳文度撰文度字憲之應天人成化壬辰進士官至南京戶部尚書事蹟附見明史張泰傳是集詩一卷文二卷皆詞旨樸儻蓋文度官汀州知府



時有惠政汀州人爲之刊行以誌遺愛是固不以

詞采論也

文溫州集十二卷

浙江巡撫採進本

明文林撰林有瑯琊漫鈔已著錄林嘗爲溫州府知府故其集以溫州名其中陳馬政諸篇皆官南京太僕寺丞時作總題以溫州從所終也

孫清簡公集二卷

兩江總督採進本

明孫需撰需字字吉別號冰檠翁德興人成化壬辰進士官至南京吏部尙書諡清簡事蹟附見明

史孫原貞傳需初爲南京御史以劾妖僧繼曉廷杖調外爲禮部尙書又忤劉瑾罷官以風節著巡撫河南陝西鄖陽抑權貴綏流亡尤具有循績詩文則非所長是集初名冰檠彙其孫世良改今名末有隆慶庚午世良記曰壬戌循例至京師奉遺稟請瞿昆湖姜晉齋摘其尤者得四帙丁卯過常郡謀諸王百穀更爲分門別類釐爲上下二卷是刻豈欲上匹大方持示海內第俾子孫異日有所取以承藉云耳其言篤實想見需之家法王世貞



序謂其詩文冲然而不為藻采淡然而若無深思亦有微詞焉

石淙橐十九卷

安徽巡撫採進本

明楊一清撰一清有關中奏題橐已著錄考明史藝文志載一清奏議三十卷石淙類橐四十五卷詩二十卷今所傳關中奏題橐已與三十卷之數不符此本有詩無文首鳳池橐次省墓橐次禪後橐次西巡橐次北行橐次容臺橐次行臺橐次歸田前橐次自訟橐次制府橐次吏部橐次王堂橐

次歸田後橐次督府橐次王堂後橐各以類分止十九卷與藝文志卷目亦不合惟督府橐後別附簡札一卷當為文集中一種裝緝誤入於此史志或併此數之歟

東溪橐十卷

兩淮鹽政採進本

明鄧庠撰庠字宗周宦章人成化壬辰進士官至南京戶部尚書終蘇州巡撫是編乃其詩集凡吟橐五卷入觀聯句錄一卷續橐三卷別橐一卷而以石瑋所作小傳附焉



梅巖小橐二十卷

浙江汪汝璫家藏本

明張旭撰旭字廷曙休甯人成化甲午舉人歷官孝豐伊陽高明三縣知縣是集凡詩二十二卷文八卷其詩長於集句採摭成語位置聯絡往往如出自然其所自作則雖律調工整而傷於剽利蓋學長慶集而不至者也散體諸文大抵應俗之作矣

東田漫橐六卷

直隸總督採進本

明馬中錫撰中錫字天祿別號東田故城人成化

乙未進士官至左都御史事蹟具明史本傳是集為其子師言所編同邑孫緒序之稱其詩卑者亦邁許渾高者當在劉長卿陸龜蒙之列而其末力詆竊片語擗數字規規於聲韻步驟摹仿愈工背馳愈遠蓋為李夢陽而發其排斥北地未為不當然中錫詩格實出入於劔南集中精神魄力尙不能逮夢陽也

別本東田集十五卷

直隸總督採進本

明馬中錫撰是集為



國朝康熙丁亥中錫鄉人賈棠所刊凡文五卷詩十卷案嵩陽雜識曰李空同與韓貫道草疏劉瑾切齒必欲置之死賴康許西營救而脫後許西得罪空同議論稍過嚴人作中山狼傳以詆之王士禎居易錄亦稱中錫中山狼傳為刺李夢陽負康海而作今其文在第五卷中然海以救夢陽坐累夢陽特未營救之耳未嘗逞凶反噬如傳所云云也疑中錫別有所指而好事者以康李為同時之人又有相負一事附會其說也

滇南行橐四卷附錄一卷

江西巡撫採進本

明蘇章撰章字文簡號雲崖餘干人成化乙未進士官至延平府知府初章官兵部主事時因星變事劾妖僧繼曉方士李孜省謫姚安通判因哀其所作其為一集故以滇南行橐為名未附詞四闕祭胡敬齋文一首附錄一卷則其行實及諸家題跋與人祀鄉賢文卷也章少問學於陳獻章之門嘗出胡居仁於獄與吳與弼亦友善蓋亦刻意講學者故所作皆率意而成不能入格云



七星詩文存十二卷

江西巡撫採進本

明劉鴻撰鴻字雲表泰和人以居七星坳自號七星居士成化丁酉舉人屢上公車不第遂放游山水以終是集為泰和知縣區時行所編前有正德五年羅欽順序其文風格疎暢多自抒抑塞磊落之懷詩則率意而成與寄頗淺五言絕句中西州詞第一首乃全錄西州古詞四句殊不可解疑或手書是詞其後人不考而誤收也

碧川文選四卷

兩江總督採進本

明楊守陟撰守陟字惟立號碧川鄞縣人成化戊戌進士官至南京吏部左侍郎加尙書銜致仕事蹟附見明史楊守陳傳案明分省人物考云碧川文鈔二十九卷雜文儲彙又若干卷此本為其外孫陸錡所刻前有陳琳序曰楊公自摘手彙凡一百五十三篇藏於家陸君釐為四卷云云則此為守陟手定之本矣明人物考又云守陟嘗書數語於遺橐曰學文師韓吏部學道師程伊川然其文才力萎弱不能規撫韓筆也



西征集

無卷數 浙江汪汝璫家藏本

明林俊撰俊有見素文集已著錄是集皆其正德四年再起官四川巡撫平定巴夔土寇時作故以西征為名凡詩歌一百二篇跋二篇賦一篇書二十三篇祭文二十四篇序四篇記五篇末附戴錦所撰西征傳述靖亂始末頗詳

半江集十五卷

兩淮馬裕家藏本

明趙寬撰寬字栗夫號半江吳江人成化辛丑進士官至廣東按察使是集初為其邑人王思誠所

刊王守仁費宏皆為之序守仁序不載卷數但惜其遺藁散佚宏序稱詩六卷文如之此本凡詩八

卷文七卷蓋其仲子禴掇拾補緝又增三卷也

柴墟齋集十五卷

兩江總督採進本

明儲懔撰懔字靜夫號柴墟泰州人成化甲辰進士官至戶部侍郎劉瑾用事引疾歸瑾誅復起調南京吏部侍郎卒諡文懿事蹟具明史文苑傳是集為其曾孫耀所刊詩五卷序文三卷墓誌一卷雜著一卷奏疏一卷書簡三卷懔嘗與李夢陽何



景明徐禎卿相倡和其詩規仿陶韋文亦恬雅至  
於才力富健則不及夢陽等也

虛齋先生遺集十卷

編修祝德麟家藏本

明祝萃撰萃字維真海甯人成化甲辰進士官至  
廣東布政司參政是集文五卷詩五卷文頗春容  
詩亦妥帖蓋成宏閒臺閣之體也

蔡文莊集八卷

浙江巡撫探進本

明蔡清撰清有易經蒙引已著錄其集凡有二本  
一為石崖葛氏所刊即明史藝文志所載五卷之

本一即此本乾隆壬戌其族孫廷魁所重刊也目  
一卷至五卷仍其舊文而重訂其目又搜輯墨蹟  
遺彙為補遺一卷附以其孫邦駒所集事蹟及志  
書傳序為附錄二卷集中有與孫九峯書述甯王  
宸濠譏其不能詩文廷魁序中因反覆辨論歷詆  
古來文士而以清之詩文為著作之極軌夫文以  
載道不易之論也然自戰國以下即已岐為二途  
或以義理傳或以詞藻見如珍錯之於菽粟錦繡  
之於布帛勢不能偏廢其一故謂清之著作主於



講學明道不必以聲偶為詩以彫繪為文此公論也  
謂文章必以清為正軌而漢以來作者皆不足以  
為詩文則主持太過矣廷魁序又稱以家藏密箴  
善本太極圖說河洛私見三種附焉而此本無之  
蓋本各自為書故或附載或別行也

雪洲文集十四卷

浙江巡撫  
採進本

明黃瓚撰瓚字公獻儀真人成化甲辰進士官至  
南京兵部侍郎是集乃其子襄所刊自一卷至六  
卷為詩自七卷至十二卷為文十三十四兩卷題

曰續集詩文竝列蓋補遺也詩多伉厲之響文亦  
意境未深集中載為山東巡撫時薦劾方面各官  
疏於所糾之人俱闕其名殆不欲暴人之短耶

兩村集四卷

直隸總督  
採進本

明周東撰東字伯震號兩村阜城人成化甲辰進  
士官至大理寺少卿以伉直忤劉瑾時寘鐺將變  
乃使勘事陝西會亂作死之是集詩一卷雜文一  
卷其後二卷為正論八篇蓋東所著之子書編以  
入集詩文皆不甚留意正論多刺時之語蓋亦發



欽定四庫全書 蘇軾詩集卷一百一十五  
憤而著書然東之足不朽者終在氣節也

松蘿詩堂集十一卷

兩淮鹽政  
採進本

明楊循吉撰循吉有蘇州府纂修識異已著錄其平生詩文雜著幾及千卷蕪累頗甚是集雖經別裁尚多俗體蓋循吉任誕不羈故其詞往往近俳云

都下贈僧詩一卷

浙江汪汝  
璞家藏本

明楊循吉撰循吉好與方外遊成化丙午大給祠牒吳僧多集京師其所識緇流時或往訪比其還

也各賦詩以送之因錄爲一通吳寬跋其後後二年循吉復摹寬書刻之持定塔院

菊花百詠一卷

浙江汪汝  
璞家藏本

明楊循吉撰以菊花種類各案其名系以七言絕句分爲十一類天文類自滿天星以下三首地理類自岳州紅以下三首人物類自狀元紅以下二首十一首宮室類金樓子一首珍寶類自銀絞絲以下七首時令類自海棠春以下六首花木類自白牡丹以下三十二首身體類自金寶相以下三首



鳥獸類自金鳳仙以下十三首衣服類自黃疊羅  
以下十四首器用類自蘸金香以下十八首

齋中拙咏一卷

浙江汪汝  
璉家藏本

明楊循吉撰凡古今體詩二十一首皆循吉官禮  
部主事以病乞歸將發京師及至家後所作又以  
成化甲辰丙午至宏治戊申所作聯句詩六首附  
於末徐景鳳彙刻循吉所著為南峯逸藁此其一  
種也

燈窗末藝一卷攢眉集一卷

浙江汪汝  
璉家藏本

明楊循吉撰皆所作古文合兩集僅四十餘首頗  
宕逸有奇氣而縱橫曼衍亦多不入格徐景鳳亦  
嘗刻入南峯逸藁中

東所文集十三卷

浙江汪啟  
淑家藏本

明張詡撰詡有白沙遺言已著錄是集凡雜文十  
卷詩三卷其學出於新會故所為白沙文集序白  
沙遺言纂要序周禮重言重意互註序及學記與  
友人往復諸書大抵皆本陳氏之說

南海雜詠十卷

浙江汪汝  
璉家藏本

欽定四庫全書總目卷一百七十五

集部 別集類存目二

空



明張詡撰是集雜詠廣州古蹟分爲九門每題之下各列小序皆摭志乘爲之無所糾正詩亦罕逢

新語

李大厓集二十卷附錄一卷

浙江孫仰曾家藏本

明李承箕撰承箕字世卿嘉魚人讀書大厓山自號大厓居士成化丙午舉人嘗徒步至嶺南從陳獻章游及歸遂隱居黃公山不復仕進明史儒林傳附載於獻章傳末是編乃其弟立卿所刻明史藝文志載大厓集二十卷與此本合前十二卷爲

詩後八卷爲雜文附錄一卷則墓表行狀及陳獻章所贈詩文前有其兄承芳所作采菊橐引采菊橐者卽獻章所贈古詩凡十三首裝潢成卷以其首句有采菊二字因以名焉然此宐入附錄乃以冠諸簡端蓋欲假獻章以重承箕殊非體例且重不重繫乎其人亦不繫乎其師也

費文憲集選要七卷

兩江總督採進本

明費宏撰宏字子充鉛山人成化丁未進士第一官至吏部尙書華蓋殿大學士諡文憲事蹟具明



史本傳所著鵝湖摘彙本二十卷此本乃徐階劉

同升所選錄非全帙也

湘臯集三十三卷

浙江孫仰會家藏本

明蔣冕撰冕字敬所

案明史本傳冕字敬之然編首王宗沐黃佐陳邦傳呂調

陽四序俱稱敬所同時之人不應有誤疑明史乃刊本之訛

全州人成化丁未

進士官至戶部尚書謹身殿大學士諡文定事蹟

具明史本傳是集分奏對四卷奏疏三卷附錄召

對及經筵講章敕諭等彙一卷詩八卷詞一卷序

記等雜文十六卷冕當正德之末主昏政怠獨持

正不撓凡所建白俱切時務嘉靖初大禮議起冕

固執為人後之說卒齟齬以去丰裁嶽嶽在當時

不愧名臣其詩文則未能挺出也

別本熊峰集四卷

浙江汪汝璫家藏本

明石瑤撰瑤有全集十卷已著錄案朱彝尊明詩

綜稱瑤所著名恆陽集曲周令皇甫汈刪定為四

卷詩僅一百九十餘首今此集題作熊峰先生集

前後無序跋詩亦一百九十餘首而詩綜所錄惟

春日雜言秋蓮曲會昌宮詞三首在集中其送邵



國賢芟田行春渡滹沱諸篇皆未之載疑此爲初刊別行之本非汭所選故集名亦各不同然卷數篇數又合殊不可解今未見原刻其同異莫能詳也以此雖舊本而不及康熙中所刻新本之駭備故錄其新本而此本附存目焉

堇山集十五卷

浙江孫仰曾家藏本

明李堂撰堂字時升鄞縣人成化丁未進士官至工部右侍郎總理漕河鄞有赤堇山卽越絕書所謂赤堇之溪涸而出銅者堂居其側故以名集其

文根據未深持論頗多臆斷

西軒效唐集錄十二卷

浙江孫仰曾家藏本

明丁養浩撰養浩字師孟別號西軒仁和人成化丁未進士官至雲南布政使是集詩八卷文四卷其名效唐者蓋取法唐人之意然殊不類唐音也

鼇峰類彙二十六卷

浙江巡撫採進本

明毛紀撰紀有密勿彙已著錄是集乃紀致仕後所手定前十八卷爲文後八卷爲詩朱彝尊明詩綜載紀有鼇頭類彙蓋卽此編校刊偶疎誤以峰



字爲頭字也

赤城集二十三卷

兩淮馬裕家藏本

明夏鍬撰鍬字德樹天台人成化丁未進士官至南京大理寺左評事事蹟附見明史夏堦傳其詩欲爲別調而轉乖雅則文亦惟意所知不可繩以古法史稱鍬宏治四年謁選時疏請復李文祥羅倫官併請罷大學士劉吉忤旨下獄後官評事時又疏論賦斂徭役馬政鹽課利弊及宗藩戚里侵漁狀蓋亦讜正之士非專意於詞章者也

西巡類彙八卷

浙江范懋柱家天一閣藏本

明吳廷舉撰廷舉字獻臣梧州人成化丁未進士官至南京工部尙書諡清惠事蹟具明史本傳此集乃其正德初官廣東按察司副使時巡歷省治以西諸郡所上奏疏及往來文牘詩詞之類故曰西巡類彙明史言其發中官潘忠罪爲忠反訐下詔獄劉瑾矯詔枷之幾死今觀此編廷舉所上凡十疏內有劾岷王府內監陳鶴稱令旨差往廣東違法乘驛騷擾又奏各省鹽務差內監查盤者因



斂銀內進又有人事銀以賄各衙門賀禮銀以賄  
司禮監此三者竝科擾百姓請敕御史體察而盤  
查廣東鹽庫之內監韋靈將鹽課盡解京令廣東  
無以充軍餉其事不可行其關涉於內官者不過  
如此無發潘忠罪事編首有劉瑞序云逆瑾切齒  
於君其黨探望風旨誣奏卽械下錦衣衛獄枷吏  
部門左垂死而後釋之瑞廷舉同時人其言必得  
實然則史傳疑誤也

月湖集四十八卷

浙江巡撫  
採進本

明楊廉撰廉字方震豐城人成化丁未進士官至  
南京禮部尙書諡文恪事蹟具明史儒林傳是編  
凡分六集以所作歲月核之月湖淨稟十九卷續  
稟二卷遺稟一卷當在前月湖四稟十卷五稟七  
卷六稟七卷當在後原本次序顛倒蓋編次偶誤  
也廉以氣節稱而其父崇嘗從吳與弼游因亦喜  
講學請頒薛瑄讀書錄於同朝請躋周程張朱於  
漢唐諸儒上皆其所奏故其詩多涉理路其文亦  
概似語錄云



程念齋集十卷

江西巡撫  
探進本

明程楷撰楷字念齋饒州人成化丁未進士改庶吉士是集未有方冀跋稱其家居時所著有東樓南樓日錄遊太學時有屏嵐書屋橐官翰林時有來英亭橐皆散落不存此本乃其郡人史簡所摘鈔凡文七卷詩詞八卷古文具有一閒架而醞釀未深詩詞亦多率意之作不畱心於陶鍊

欽定四庫全書總目卷一百七十五

南海譚懋安初校  
番禺高學燿覆校



